

# 21. <sup>æek</sup> korrika

2019ko apirilaren 4tik 14ra **GARESTIK GASTEIZA**



21. <sup>æek</sup> korrika  
2019ko apirilaren 4tik 14ra  
**GARESTIK GASTEIZA**



## Garestik Gasteiza **B1**

Hil gutxi barru, milaka eta milaka euskaltzale ibiliko dira Euskal Herri osoan korrika, euskararen alde. *Izan ere<sup>1</sup>*, apirilaren 4an, KORRIKAREN beste edizio bat abiatuko da Garestik, eta, hamaika egun geroago, hilaren 14an, Gasteizen izango du amaiera jendetsua. Bidean, edizio guztietan bezala, zazpi herrialdeetako herri gehienetatik igaroko da euskararen aldeko lasterketa.





## GARES

**Perdoneko mendilerroko hegoaldean, Iruñetik 24 kilometrora, Gares herria dago. Gares leku garrantzitsua da Donejakue bidean, bertan Orreagatik eta Somportetik datozen erromesak<sup>2</sup> elkartzen baitira. Aurten, baina, bestelako peregrinazioa abiatuko<sup>3</sup> da Nafarroako udalerrri horretatik, euskaltzaileen peregrinazio erraldoia, Euskal Herri osoa zeharkatuko duena: KORRIKA.**

## Bardeatik Pirinioetara

Nafarroa Garaian, **denetariko**<sup>4</sup> paisaiak daude: hegoaldean, Bardeako **basa-mortua**<sup>5</sup>; iparraldean, Iratiko basoa eta Pirinioetako mendi elurtuak. 21. KORRIKA, Garestik atera ondoren, leku horietan ibiliko da, hasierako egunetan: Lizarraldetik eta San Adriandik Erriberara joango da, Bardea ingurura; ondoren, Tafallaldea eta Zangozaldea **zeharkatuko**<sup>6</sup> ditu, eta Zaraitzu eta Aezkoa **haranetara**<sup>7</sup> igoko da, Pirinioetako elurren ondora.

Apirilaren 6an, Aioztik pasatu ondoren, KORRIKA Iruñera heldu eta bertan ibiliko da, gaueko bederatziak arte. Orduan, korrikalariak Pirinioetarantz abiatuko dira berriro, eta gauerdian Orreagan egongo dira. Ibañeta mendatea **gainditu**<sup>8</sup> -1.053 metrora, edizio honetako lekurik garaiena izango da-, eta Iparraldean izango dira.

## Iparraldean ere lasterrez<sup>9</sup>

KORRIKA goizaldeko hirurak aldera helduko da Donibane Garazira. Ondoren, Oskitze mendatetik, Zuberoan sartuko da, eta, **egunsentian**<sup>10</sup>, Maulen izango da, Zuberoko hiriburuan, hain zuzen. Egun horretan, korrikalariak Iparralde osoa gurutzatuko dute, ekialdetik mendebaldera, eta, arratsaldeko seiak aldera, Baionan egongo dira. Laster, Angelun, Kantauri itsasoa ikusi ahal izango dute, eta handik, kostaldetik urrundu gabe, Irunera joango dira.

7tik 8rako gauean, Hegoaldean ibiliko da berriro KORRIKA: Irunen eta Hondarribian, hasieran, eta Nafarroako Bortzirietan gero. Goizaldeko seiak aldera, Lizarrieta mendatean zehar, Iparraldean itzuliko da. Astelehen goizean, azken kilometroak egingo ditu 21. KORRIKAk Iparraldean; Sara, Ezpeleta eta Ainhua bisitatu ondoren, Nafarroa Garaian sartuko da berriro, Dantxarinetik.

## Mahastien<sup>11</sup> artean

Apirilaren 9an, Baztan utzi ondoren, korrikalariak Ultzama, Basaburua eta Larrauneko basoetan ibiliko dira. Handik, Sakanara joango dira, eta, Aralar eta Urbasa **mendilerroen**<sup>12</sup> artetik, Arabarantz abiatuko dira.

Apirilaren 10ean, goizaldeko seietan, KORRIKA Lautadan sartuko da, eta Kanpezutik Errioxara joango da. Korrikalariak mahastien artean ibiliko dira, gaua iritsi arte. Azkenik, Urizaharra mendatea gurutzatu eta, Trebiñutik eta Añanatik igaro ondoren, Gorbeia **magalera**<sup>13</sup> iritsiko dira. Barrerilla mendatea jaitsi, eta Urduñan izango dira, Bizkaiko hiruburu zaharrean, alegia.

### APIRILAK 4

#### GARES 17:00

Lizarra 19:25  
Lodosa 23:26

### APIRILAK 5

Tutera 08:35  
Tafalla 17:05  
Zangoza 22:30

### APIRILAK 6

Jaurrieta 05:50  
Iruñea 14:47  
Orreaga 23:45

### APIRILAK 7

D. Garazi 02:47  
Maule 07:10  
Baiona 18:05

### APIRILAK 8

Irun 00:45  
Elizondo 13:22  
Lekunberri 19:23

### APIRILAK 9

Altsasu 04:45  
Agurain 07:53  
Bastida 19:15

### APIRILAK 10

Laudio 08:17  
Galdakao 12:12  
Algorta 21:39

### APIRILAK 11

Barakaldo 00:31  
Bilbo 11:46  
Gernika 20:11

### APIRILAK 12


Lekeitio 01:32  
Zarautz 13:00  
Donostia 16:28

### APIRILAK 13

Hernani 01:24  
Tolosa 04:15  
Durango 18:55

### APIRILAK 14

Otxandio 01:00  
Arrasate 03:52  
**GASTEIZ 12:30**



### Itsasoari begira

Urduñatik, Arabako Aiaraldera joango da KORRIKA, eta handik, Nerbioi ibaiari jarraiki, Bizkaira itzuliko da. Egun horretan, korrikalariak Hego Uribe, Txori-erri eta Uribe Kosta bisitatuko dituzte. Handik, Bizkaiko Zubi ospetsua gurutzu ondoren, Ezkerraldera joango dira, eta, 10etik 11rako gauean, Bizkaiko mendebaldean ibiliko dira, Meatzaldean eta Enkarterrin, zehazki.

Eguerdi aldera, KORRIKA Bilbora iritsi eta auzoz auzo ibiliko da. Arratsaldean, hiriburutik atera eta, Txorierritik igarota, Busturialdera eta Lea-Artibaira hurbilduko da.

12an, Gipuzkoan sartuko da lasterketa. Debabarrena, Eibarraldea, Urola, Urola Kosta eta Lasarte zeharkatu ondoren, Donostiara iritsi eta bertan ibiliko da, gauera arte. Donostiatik Oarsoaldera joangoa da, Pasaian **itsasadarra**<sup>14</sup> traineruz gurutzatuko du, eta, itsasoari agur esanez, Gasteizerako bidea hartuko du.

### Gasteizerantz

13ko goizaldean, Hernanialdean izango da KORRIKA. Gasteizera iristeko, 36 ordu baino ez dira faltako, baina, ailegatu aurretik, Gipuzkoako eta Bizkaiko hainbat eskualde zeharkatuko ditu: lehenengo herrialdean, Tolosaldea, Goierri, Urola Garaia, Debagoiena eta Eibarraldea; bigarren, Durangaldea eta Arratia. Azkenik, An-



boto inguratuta, Otxandiotik Bizkaia utzi, eta, Debagoienetik, Gasteizerantz abiatuko dira korrikalariak, lasterketari merezi duen amaiera emateko asmoz.

### KORRIKAren APPa

KORRIKAren jarraipena erosoago egin ahal izateko, AEK-k APP bat jarriko du martxan datozen asteotan. Aplikazio horren laguntzaz, lasterketa non dagoen edo gure herrira noiz iritsiko den jakin ahal izango dugu.

Ibilbideari buruzko informazioaz gain, aplikazioan KORRIKA kulturalaren agenda ezagutu ahal izango dugu, baita aplikazioan bertan zabalduko den lehiaketan parte hartu ere.

### GASTEIZ

**KORRIKA, orain arte, bi aldiz amaitu da Gasteizen.**

**21. edizioa, beraz, hirugarrena izango da. Lasterketa 8:30ak aldera sartuko da Gasteizen, eta, 12:30ean, milaka eta milaka euskaltzale bilduko ditu Andre Maria Zuriaren plazan. Bertan, Euskal Herri osoan eskuz esku ibilitako mezua irakurri ondoren, lasterketa amaitu eta azken eguneko jai handia hasiko da.**



### AZPIMARRA ITZAZU FORMA EGOKIAK ESALDI HAUEK OSATZEKO.

1. Gares herri garrantzitsua da Donejakue bidean; **hala ere/izan ere/baita ere**, bertan Orreagako eta Somporteko bideak elkartzen dira.
2. Ibañeta **gainditzerakoan/gainditzean/gainditutakoan**, KORRIKA Iparraldean sartuko da.
3. Apirilaren 13an, KORRIKA Durangaldean ibiliko da, eta Arratian **ere bai/baita/ere**.
4. Aoizetik, **Iruñera bidea/Iruñerantz bidea/Iruñerako bidea** hartuko du KORRIKAK.
5. Apirilaren 14an, Gasteiz euskaltzalez **betetzea/betetzen/betetzeko** asmoa du KORRIKAK.
6. Orain arte, KORRIKA **bitan/bietan/bian** amaitu da Gasteizen.
7. KORRIKA apirilaren 10ean igaroko da Urduñatik, eta, **biharamunean/datorren egunean/beste egunean**, Bilbora iritsiko da.

1. **Izan ere:** de hecho; *en fait*
2. **Erromes:** peregrino,-a; *pèlerin,-e*
3. **Abiatu:** dirijirse; *se diriger*
4. **Denetariko:** de todo tipo; *de toute sorte*
5. **Basamortu:** desierto; *désert*

6. **Zeharkatu:** atravesar; *traverser*
7. **Haran:** valle; *vallée*
8. **Gainditu:** superar; *franchir*
9. **Lasterrez:** korrika, Iparraldean.
10. **Egunsenti:** amanecer; *aube*
11. **Mahasti:** viñedo; *vigne*

12. **Mendilerro:** cordillera; *cordillère*
13. **Magal:** ladera; *flanc*
14. **Itsasadar:** ría; *ria*



# 04 Denbora-pasak

## HITZ GURUTZATUAK


TOPATU KORRIKARI HASIERA EDO AMAIERA EMAN DIOTEN HERRI EDO HIRIEN IZENAK.

### GOITIK BEHERA:

1. Euskaldunon historiako garaipenik ezagunena da bertakoa. 778an izan zen.
2. Txingudiren eskuinaldean kokatua, Hondarraitz hondartzagatik bisita ugari jasotzen ditu udaran. Abadia Jauregia ere bertan da.
3. Euskal Herriko hiribururik jendetsuena da.

### EZKERRETIK ESKUINERA:

4. Arabaren bihotzean dago, "konderri" batean.
5. Hiriburu honetako patroia San Saturnino da.
6. Lehen KORRIKAREN abiapuntua izan zen.
7. Kobazulo bereziak ditu ingurunean. Estalaktitik eta estalagmitak ezker-eskuin ikus ditzakegu bertan!
8. Zubi erromatar oso ezaguna du, eta aurtengo KORRIKAREkin lotura estua du.



## BOST BAIETZ

BILA ITZAZU AUKERA ZUZENAK:

ARIKETEN ETA DENBORA-PASEN ERANTZUNAK:  
<http://www.korrika.eus/euskaltegi-etarako-unitate-didaktikoak.html>

1

**20 edizioetan, KORRIKARI hasiera...**

- A. ... herri txikiek eman diote, eta amaiera hiriburuek.
- B. ... herri txikiek eman diote, eta amaiera herri txiki zein hiriburuek.
- C. ... herri txiki zein hiriburuek eman diote, eta amaiera hiriburuek.

2

**20 edizioetan, KORRIKA...**

- A. 7 aldiz amaitu da Bilbon.
- B. 4 aldiz hasi da Iruñean, eta 4 aldiz amaitu da bertan.
- C. 2 aldiz hasi da Gasteizen, eta 2 aldiz amaitu da bertan.
- D. Aurreko guztiak zuzenak dira.

3

**Arabako Lautadatik pasatzean, zein elikagai tipiko aurkituko dute korrikalariek?**

- A. Piperrak.
- B. Babarrunak.
- C. Patatak.
- D. Pikillo-piperrak.

4

**Pertsona famatu hauetako bat gasteiztarra da. Badakizu nor?**

- A. Jon Maia bertsolaria.
- B. Toti Martinez de Lezea idazle eta itzultzailea.
- C. Txillardegia euskal idazle, politikari eta pentsalaria.
- D. Denak dira gasteiztarrak.

5

**2016an, Nafarroa Garaiko biztanleen...**

- A. ...% 5,2 euskaldunak ziren, % 6,5 euskaldun hartzaileak eta % 88,3 erdaldunak.
- B. ...% 12,9 euskaldunak ziren, % 10,3 euskaldun hartzaileak eta % 76,7 erdaldunak.
- C. ...% 21,1 euskaldunak ziren, % 13,3 euskaldun hartzaileak eta % 65,6 erdaldunak.

